

## ВО СУББОТА 8-Ю СЕДМИЦЫ ПО ПАСХЕ

### В ПЯТОК ВЕЧЕРА

Кафисма рядовая. На Господи возвах: стихиры, и служба вся праздника, кроме паремий и входа, якоже указася на отдавание вознесения Христова.

Такожде и в сию

### СУББОТУ 8-Ю НА УТРЕНИ

Служба вся праздника, кроме полиелеа, и степенны и Евангелиа: точною на утрени канон праздника со ирмосом на 8: ирмос по дважды. Другий канон праздника со ирмосом на 6: ирмос по дважды. Катавасиа, ирмос 2-го канона: Божественным покровен: оба лика вкупе. Славословие великое, и ектении и отпуст. На отпусте поминает иерей святого, егоже есть день. И час первый. На часех тропарь и кондак праздника. И конечный отпуст.

### НА ЛИТУРГИИ:

Блаженна праздника, песнь 9-я обоих канонов, на 8.

На палящей древле огненной колеснице, ревнитель и огнедохновенный радуся носимь, еже ныне возсиявшее дохновение свыше апостолом являше: от негоже освятившеся, Троицу всем сказаша. [Дважды.]

Закона естеств кроме, странное слышашеся учеников: единому бо гласу гласящу Духа благодатию, различне оглашахуся людие, племена и языки божественная величия, Троицы ведению научающе. [Дважды.]

Пети подобаше естественнोजизненную Отроковицу: едина бо во чреве скры Слово, таящееся недугующаго человеческого естества. Иже в десных странах ныне седай Отчих, посла благодать Духа. [Дважды.]

Слава: Елицем дхну боготочная благодать, светящеся, блистающе, изменяеми странным изменением благолепнейшим, равносильствующую несекомуу уведевше премудрость, Трисветлое существо славим.

И ныне: Елицем дхну боготочная благодать, светящеся, блистающе, изменяеми странным изменением благолепнейшим, равносильствующую несекомуу уведевше премудрость, Трисветлое существо славим.

По входе тропарь праздника, глас 8-й:

Благословен еси Христе Боже наш, иже премудры ловцы явлей, низпослав им духа святого, и теми уловлей вселенную, Человеколюбче слава Тебе.

Слава, и ныне: Кондак праздника, глас 8-й:

Егда снизшед языки слия, разделяше языки вышний: егда же огненные языки раздаяше, в соединение вся призва, и согласно славим всесвятого Духа.

Прокимен, глас 8-й: Во всю землю изыде вещание их, и в концы вселенныя глаголы их. [И до отдания.]

Стих: Небеса поведают славу Божию, творение же руку Его возвещает твердь.

К Римляном Послание, зачало 79: (Рим. 1:7-12)

**Б**ратие, благодать вам и мир от Бога Отца нашего, и Господа Иисуса Христа. Первое убо благодарю Бога моего Иисусом Христом о всех вас, яко вера ваша возвещается во всем мире. Свидетель бо ми есть Бог, Емуже служу духом моим во благовествовании Сына Его, яко безпрестани память о вас творю, всегда в молитвах моих моляся, аще убо когда поспешен буду волею Божиею приити к вам. Желая бо видети вас, да некое подам вам дарование духовное, ко утверждению вашему. Сие же есть, соутешитися в вас верою общию, вашею же и моею.

Аллилуиа, глас 1-й: Словом Господним небеса утвердишася, и Духом уст Его вся сила их.

Стих: С небесе призре Господь, виде вся сыны человеческия.

Евангелие от Матфеа, зачало 15: (Мф. 5:42-48)

**Р**ече Господь: просящему у тебе дай, и хотящаго от тебе зяяти не отврати. Слышасте, яко речено есть: возлюбииши искренняго твоего и возненавидиши врага твоего. Аз же глаголю вам: любите враги ваша, благословите кленущыя вы, добро творите ненавидящим вас, и молитесь за творящих вам напасть и изгонящыя вы. Яко да будете сынове Отца вашего, Иже есть на небесех, яко солнце Свое сияет на злыя и благия и дождит на праведныя и на неправедныя. Аще бо любите любящих вас, кую мзду имате? Не и мытари ли тожде творят? И аще целуете други ваша токмо, что лишше творите? Не и язычницы ли такожде творят? Будите убо вы совершенни, якоже Отец ваш Небесный совершен есть.

За Достойно: поем и до отдания ирмос:

**Ирмос:** Радуйся Царице, матередевственная славо: всяка бо удобообращательная благоглаголивая уста витийствовати не могут, Тебе пети достойно: низумевает же ум всяк Твое Рождество разумети. Темже Тя согласно славим.

Причастный: Дух Твой Благий наставит мя на землю праву.  
Аллилуиа. [Трижды.]